



**TUZLA** Suđenje Toriću i Osmanoviću za zloupotrebu položaja

# Poslanik u PFBiH tražio 20.000 KM za zaposlenje

Nisu to neke pare. Radit ćeš 30 godina, a plaća ti je viša od 1.100 KM, pričavala je svjedokinja razgovor s Osmanovićem

Svjedočenjem troje svjedoka jučer je u Općinskom sudu Tuzla nastavljeno suđenje Midhatu Osmanoviću, bivšem poslaniku u Parlamentu FBiH, i Velidu Toriću, bivšem direktoru Zavoda zdravstvenog osiguranja (ZZO) TK. Sudi im se zbog više krivičnih djela u vezi sa zloupotrebom službenog položaja i ovlaštenja.

## Doktor Mido

Enesa Nišić, radnica u poslovnici ZZO TK u Srebreniku, kojoj je ugovor za posao stalno produžavan za 30, 60 ili 90 dana, ispričala je šta je prethodilo hapšenjima dvojice optuženika, nakon što je Torić ponudio da joj "doktor Mido pomogne u vezi sa zaposlenjem na neodređeno".

- Tadašnji direktor Torić pozvao me na razgovor pred istek posljednjeg ugovora i pitao me znam li koga iz Stranke za BiH u Srebreniku te mi je dao Osmanovićev broj telefona, da mu se javim. Nakon nekoliko dana Edin Mutapčić iz Općinskog odbora SBiH Srebrenik rekao mi je da je Osmanović poručio da ga lično pozovem, što sam uradila i sastanak je dogovoren krajem sedmice u restoranu prekoputa Doma kulture u Srebreniku - kazala je Nišić, na šta je Osmanović, koji je u sudnici sjedio iza njenih leđa, odmahnuo glavom i nasmejao se.



Torić i Osmanović jučer u sudnici: Svjedokinja iznijela detalje o korupciji

U restoranu joj je, kako je kazala, rekao da ugasi mobilni, jer "nema mobitela dok se s njim razgovara", i dodao da zna za njen problem.

- Pitao me: "Znaš li ti, Enesa, da svaka usluga ima cijenu ili protuuslugu? Moja usluga košta 20.000 KM." To me šokiralo, što je i on vidio, pa je nastavio: "Nisu to neke pare. Radit ćeš 30 godina, a plaća ti je viša od 1.100 KM." Rekao je da se preračunam s mužem i da ga pozovem do utorka popodne, a već u srijedu će smatrati da sam odustala. Naglasio je da razgovor ne smije procuriti - ispričala je Nišić, koja je po

dolasku kući dugo razgovarala s porodicom.

Odlučili su slučaj prijaviti Obavještajno-sigurnosnoj agenciji (OSA), koja ih je povezala sa Državnom agencijom za istrage i zaštitu (SIPA), s kojom je Nišić pristalasaradivati.

## Susret u hotelu

- Pozvala sam ga u utorak predvečer i dogovorili smo se da se nađemo narednog dana. Oko 12 sati u srijedu pozvao me i rekao da će biti u holu hotela "Tuzla", a kada smo se našli, predložio je da prijedemo u hotelski restoran, gdje sam iz torbe, koju mi je dala SIPA, izvadila i

dala mu bijelu kovertu sa 20.000 KM, koju je stavio u svoju mušku torbicu. Rekla sam mu da je novac posuđen, a on je rekao: "Ja sam ti garancija. Ljudi grebu i rukama i nogama i za veće cifre. Evo, Mirsada moli za svog sina pravnika, a ti ćeš dobiti ugovor na neodređeno. Ako dignesh kredit, rata će ti biti 200-300 KM i to nije puno" - ispričala je Nišić, koja je nakon toga otišla, a Osmanović je uhapšen s označenim novčanicama.

Jučer je svjedočila i Hatidža Hotić, tehnički sekretar ZZO TK, kao i već Mutapčić.

**A. ARNAUTOVIĆ**